


Historia di *Quinta Del Carmen*

E historia ta cuminsa cu otorgamento di concessionnan di tereno na Bubali na aña 1839 na Pieter Kelly y na 1865 na Maria Martha Kelly. A bende tur dos concession durante un subasta publico na Adriaan Laclé na aña 1899. Den e decreto di Gobierno data December 10, 1924 e concesionnan aki a keda transferi den propiedad. E datonan aki y hopi mas ta deriva for di e notanan di Vic L. Frank "Comienso y curso di Quinta del Carmen".

Adriaan Laclé (1866 - 1935) a biba den "Steenweg" y entre añanan 1917 y 1918 ela construi un "cas di cunucu" riba e tereno na Bubali. Ela bira un cas di cunucu hopi elegante y bunita cual ta calcula cu e metzla Janchi Giel y Mani Roza di Boegoeroei lo a traha riba e construccion di esaki. Adriaan Laclé a yama e cas na honor di su yui muher Maria del Carmen.



Na 1927 Shell a establece na Aruba y a funda e Arend Petroleum Company, cu tabata situa na Eagle.

Shell a compra terenonan den vecindario di e refineria pa su staff y empleadonan di e refineria, y entre e terenonan aki di Adriaan Laclé cu a inclui Quinta del Carmen. E compra a keda oficial dia 26 di januari, 1929. E tereno rond Shell a transforma den un cancha di golf di 9 buraco. E cas tabata instala como un hospital temporario pa e refineria te cu a traha e hospital mes den aña 1926 y e cas a bira residente di e dokter Adriaan F. Dussenbroek.

Na 1927 Dr. Cameron a yega Aruba y a bai biba den e cas. Ela traha e apartamento tras di e cas pa su mama. Un par di aña despues, a traha un residencia nobo pa e dokter y Quinta del Carmen a bira un residencia pa enfermeranan. Den e añanan cu a sigui e di dos Guerra Mundial (1946- 1949) e famia Schaafsma (empleado di Shell cu su famia) a biba den Quinta del Carmen. A ricibi informacion adicional riba Quinta del Carmen via e tata di e famia Schaafsma bibando na Inglatera, despues cu su yiunan a bin Aruba na 1987 pa recorda nan infancia akinan.

Na 1953 e actividadnan di refineria a para y na 1964 a bende e tereno cu Quinta del Carmen ariba cu veterinario Egbert Johan Van De Kuip.

Sra. van der Kuip a scirbi un carta dirigi na e famia Hammers doñonan actual di e cas na 1989 den cual ela duna un reportahe extensivo di nan experiencia bibando den e cas di cual te awe nan ta sinti nan mes conecta cu ne. Nan a haci varios renovacion durante e añanan, sinembargo semper manteniendo e regla principal pa mantene e arquitectura original intacto.

Famia Van der Kuip a bende nan bunita cas cu Gerrit van den Bosch pa motibo cu nan tabata bai muda pa biba na Ecuador. Despues di e fayecimento di "GER" a pone Quinta del Carmen na benta y famia Hammers a compra esaki na 1980 cualnan a haya e tarea di sigui mantene e edificio y preserva e herencia cultural aki.

Bron: Monumentonan historico (Buki di telefon 2013)